

Kerja dakwah: Penceramah popular tiada pengecualian

IPOH - Semua penceramah bertauliah dan bebas termasuk yang popular wajib mendapatkan kebenaran sekiranya ingin melakukan kerja dakwah di negeri ini, kata Pengarah Jabatan Agama Islam Perak (JAIPK), Harith Fadzilah Abdul Halim.

Beliau berkata, perakuan dan kebenaran itu telah termaktub dalam ketetapan dibuat Majlis Agama Islam dan Adat Melayu Perak (MAIPK) dan perlu dipatuhi bagi mengelak dikenakan tindakan.

"Setiap negeri ini berbeza-beza dan Perak tetap dengan keputusan, kalau nak mengajar di masjid atau surau perlu ada tauliah.

"Kalau nak berceramah, maka perlu dapatkan kebenaran daripada pegawai tadbir agama daerah tempat ceramah itu diadakan.

"Peraturan ini terpakai untuk semua termasuk penceramah terkenal pun, jadi kena akuriah kerana itu peraturan ditetapkan MAIPK selaku pembuat dasar," katanya ketika ditemui pemberita dalam majlis Sambutan Hari Raya Masjid Muhammadiyah (Masjid Cina) di Taman Tasek Jaya dekat sini pada Ahad.

Beliau berkata demikian ketika mengulas kehadiran se-



Harith Fadzilah (tengah) meminta semua penceramah akur dengan peraturan yang ditetapkan oleh MAIPK.

orang pendakwah bertaraf profesor yang tidak mempunyai tauliah mengajar agama di negeri ini dijemput merasmikan sebuah program sekolah di Klebang seperti yang tular di media sosial.

Dalam kes itu, Harith Fadzilah berkata, JAIPK telah merujuk kepada Jabatan Pendidikan Negeri memandangkan individu berkenaan dijemput bagi tujuan rasmi di sekolah, bukan berceramah di institusi agama lain.

"Perkara ini berlaku di premis Kementerian Pendidikan,

maka kementerian yang bertindak," katanya.

Dalam perkembangan lain, beliau mengarahkan satu siasatan segera dilakukan atas dakwaan wujud aktiviti pemujaan nombor ekor di sebuah banglo lama di Bagan Serai.

Katanya, setakat ini belum ada laporan diterima berkaitan kes sedemikian.

"Kita akan minta bahagian penguat kuasa lakukan siasatan segera. Jika benar wujud seperti dinyatakan, maka tindakan akan diambil dengan kerjasama polis," katanya.